

漢魏六朝百三家集

北齊

邢特進  
魏特進

第九十一冊

EAST ASIAN LIBRARY  
RM 8049 ROBARTS LIBRARY  
UNIVERSITY OF TORONTO  
TORONTO, CANADA M5S 1A5

V. 91







卷之五



邢特進集



邢特進集題詞

濟陰溫鵬舉鉅鹿魏伯起河間邢子  
才爲北朝文人稱首楊遵彥文德論  
云古今詞人皆負才遺行唯邢子才  
王元景溫子昇彬彬有德素然則溫  
邢在當日兼以行顯非伯起驚蛺蝶



比也子才讀書五行俱下獨不喜讎  
校曰天下書至死讀不可徧焉能始  
復校此言頗疎率而後世才士間宗  
其說余度隋唐以來至今日書籍多  
子才時更數倍苟欲徧識塗慰出此  
所謂漢高取天下得意者關中耳置



學一奏事關典教餘文無絕殊者漢  
賈生公孫臣等言正朔服色事君相  
莫能遵用太史公三致慨焉以元魏  
靈后之時子才欲伸其志予竊難之  
異同交安賢愚並接抱此天資與物  
無忤然在坐作表袁翻怒爲小兒言



論相輕崔暹奪其帝聽甚哉入世之  
不易也

婁東張溥題



邢特進集目錄

賦

新宮賦

詔

爲齊文宣受禪赦詔

表

百官賀平石頭表

賀老人星表

爲文襄讓尚書令表



又

爲李衛軍以國子祭酒讓東平王表

爲彭城王韶讓侍中表

爲潘司徒樂讓表

爲司空景讓表

奏

請置學及修立明堂奏

書

答袁肇修書



遺辛術書

序

蕭仁祖集序

議

皇太子東面議

宮吏之姓與太子同名議

改葬服議

訊囚請占議

頌



甘露頌七首

銘

文襄金像銘

獻武皇帝寺銘

碑

廣平王碑

冀州刺史封隆之碑

景明寺碑

并州寺碑



謚議

文宣帝謚議

哀策文

文宣帝哀策文

墓誌

太尉韓公墓誌

李禮之墓誌

樂府

思公子



詩

三日華林園公宴

冬夜酬魏少傅直史館

冬日傷志篇

七夕

齊韋道遜晚春宴

應詔甘露詩

賀老人星詩

附錄



本傳

邢特進集目錄終

邢特進集

目錄

四



刑制通集

目錄

四



邢特進集卷全

齊河間邢邵子才著

明太倉張溥天如閱

賦

新宮賦

擬二儀而構路寢、法三山而起翼室、何大厦之  
眈眈而斯千之秩秩、豈西京之足偉、故東都之  
所匹、爾其狀也、則瓌譎屈奇、瀾漫陸離、嵯峨崔  
嵬、巉巖參差、若密雲之乍舉、似鵬翼之中垂、布



菱苹之與蓮蒂咸反植而倒施若承露而將轉  
似含風而欲披土成黼黻木化蛟螭布紅紫之  
融洩間朱黃之赫曦獸狂顧而猶動鳥將騫而  
以疲木神水怪海若山祗千變萬化殊形異宐  
陰梁北注陽鳥南施百楹列倚千櫨代支或據  
險而形固或居安而勢危



詔

爲齊文宣受禪赦詔

無德而稱、代刑以禮、不言而信、先春後秋、故知  
惻隱之化、天人一揆、弘宥之道、古今同風、朕以  
寡薄、功烈無紀、昔先獻武王、值魏世不造、四海  
幅裂、九鼎行出、祭器無歸、乃驅御侯伯、大號燕  
趙、拯厥顛墜、俾亾則存、文襄王外挺武功、內資  
明德、纂成先業、闢土服遠、年逾二紀、世厯兩都、  
獄訟有適、謳歌斯在、魏帝俯遵厯數、念在褰裳、

遠取唐虞終同脫屣實幽憂未已志在陽城而  
羣公卿士誠守逾切遂屬代終居於民上如涉  
深冰有睠終朝始發晉陽九尾呈祥升壇告天  
赤雀效祉惟爾文武不二之臣股肱爪牙之將  
左右先王光隆大業永言誠烈其茲休慶然三  
皇存教非易可免七名改咒庸可庶幾思其億  
兆同始茲日其大赦天下



表奏

百官賀平石頭表

大江設隘、實限夷華、前魏觀濤而退、後魏登山、而反、聲教不通、多厯年代、今蒼雉奉職、靈鼉自梁折葦爲舟、憑力可渡、始知德通於物、孟門失險、道清將順、劔閣自開、行舉洞庭之樂、放畜長洲之苑、會玉帛於塗山、樹銅柱於南極、

賀老人星表

冥貺未已、靈應猶臻、以某夜老人星見、達旦揚

光經旬未滅，雖三星其色。五老同遊，擬之於此。故無與匹，自非玄風感極，聖敬迴天，何能使休徵秘祉，相尋而至。故以朝夕相趨，史無停筆。

爲文襄讓尚書令表

揚職萬機，總任百揆。懸衡庶物，準納羣僚。何以助日月之光華，增天地之高厚。反鑒取照，匹此何難。倒裳求領，方之爲易。

又表

正以晝覽太山，不假秋毫之察。夜仰列宿，豈藉



燭龍之明爵人以世。旣非盛德之舉。公門有私。故是陵夷之運。

爲李衛軍以國子祭酒讓東平王表

臣聞運舟歸於積水。致遠在於逸足。未有涓澮之流。可成奔飛之用。驚蹇之乘。而有滅沒之功。旣列趙衰先人之敏。請同虞邱退身之義。具官臣某。民望時宗。聲實攸在。斧藻川流。雕篆霞蔚。焦蒲旣茂。枝葉實繁。故以學窮齊魯。聲高梁魏。詔美司朝。僉諧允在。伏願廻恩。徙授以答具瞻。

爲彭城王韶讓侍中表

貂、鷃、映、首、日、月、在、躬、冠、蓋、庶、僚、跨、躡、多、士、雖、智、  
慙、量、力、明、闕、自、知、在、梁、之、譏、無、得、誼、華、之、議、素、  
殮、之、責、豈、須、嚙、啗、之、口、何、悟、天、之、情、眷、復、延、今、  
寵、遂、總、錄、百、揆、寅、亮、萬、機、文、昌、治、本、得、失、所、繫、  
用、才、長、短、隆、替、以、之、何、容、以、斯、寡、薄、豈、得、用、膺、  
茲、忝、

爲潘司徒樂讓表

武皇帝運屬繼元事深微禹摧蚩尤之陣破尋



邑之師義開金石理昂庸駘遂日奉羈勒有事  
風塵徒備鳥背之毛曾無馬箠之力

爲司空景讓表

屬平分廣施造物多品長短入用小人見収連  
采台階堪均鼎足昨者謫見垂象災起潛伏此  
之爲累非直微躬

請置學及修立明堂奏

世室明堂顯於周夏一覺兩學盛自虞殷所以  
宗配上帝以著莫大之嚴宣布下土以彰則天

之軌養黃髮以詢哲言育青矜而敷教典用能  
享國長久風徽萬祀者也爰暨亡秦改革其道  
坑儒滅學以蔽黔黎故九服分崩祚終二代炎  
漢勃興更修儒術故西京有六學之義東都有  
三本之盛逮自魏晉撥亂相因兵革之中學校  
不絕仰惟高祖孝文皇帝稟聖自天道鏡今古  
列校序於鄉黨敦詩書於郡國但經始事殷戎  
軒屢駕未遑多就弓劍弗追世宗統厯聿遵先  
緒永平之中大興版築續以水旱戎馬生郊雖



逮爲山還停一簣而明堂禮樂之本乃鬱荆棘  
之林膠序德義之基空盈牧豎之跡城隍嚴固  
之重闕塼石之功墉構顯望之要少樓榭之飾  
加以風雨稍侵漸致虧墜非所謂追隆堂構儀  
刑萬國者也伏聞朝議以高祖大造區夏道侔  
姬文擬祀明堂式配上帝今若基址不修仍同  
邱畝卽使高皇神享闕於國陽宗事之典有聲  
無實此臣子所以匪甯億兆所以佇望也臣又  
聞官方授能所以任事事旣任矣酬之以祿如

此則上無曠官之譏下絕尸素之謗今國子雖有學官之名無教授之實何異兎絲燕麥南箕北斗哉昔劉向有言王者宜興辟雍陳禮樂以風天下夫禮樂所以養人刑法所以殺人而有司勤勤請定刑法至於禮樂則曰未敢是敢於殺人不敢於養人也臣以爲當今四海清平九服甯晏經國要重理應先營脫復稽延則劉向之言徵矣但事不兩興須有進退以臣愚量宜罷尚方雕靡之作頗省永甯土木之功拜減瑤



光材瓦之力、兼分石窟鑿琢之勞、及諸事役、非  
世急者、三時農隙、修此數條、使辟雍之禮、蔚爾  
而復興、諷誦之音、煥然而更作、美榭高墉、嚴壯  
於外、槐宮棘寺、顯麗於中、更明古今、重遵鄉飲、  
敦進郡學、精課經業、如此則元凱可得之於上、  
序游夏可致之於下國、豈不休歟、





書

答袁肇修書

魏齊世臺郎多交通饒遺肇修在尚書十年未嘗受升酒之饋邵時爲尚書與肇修有舊每於省中語戲常呼肇修爲清卿大當初肇修以太常少卿出使巡省經歷兗州時邵爲兗州刺史別後遣送白紬爲信肇修不受與邵書邵答之

一日之贈率爾不思老夫忽忽意不及此敬承來旨吾無間然第昔爲清卿今日復作清卿矣

遺辛術書

術魏末遷東徐州刺史爲淮南經略使齊天保元年睢州刺史及所部郡守俱犯大

辟朝廷以其奴婢百口及資財盡賜術三  
辭不許術乃送所司不復聞奏邵聞遺術  
書

昔鍾離意云孔子忍渴於盜泉便以珠璣委地  
足下今能如此可謂異代一時



序

蕭仁祖集序

蕭仁祖之文可謂雕章間出昔潘陸齊軌不襲  
建安之風顏謝同聲遂革太元之氣自漢逮晉  
情賞猶自不諧河北江南意製本應相詭





議

皇太子東面議

天保元年，皇太子監國在西林園，冬，會羣議皆東面。二年於北城第內，冬，會又議東面。陸印疑非禮，魏收改爲西面。邢子才議欲依前。

凡禮有同者不可令異。詩說天子至於大夫皆乘四馬，況以方面之少，何可皆不同乎？若大子定西面者，王公卿大夫士復何面邪？南面人君正位，今一官之長，無不南面。太子聽政亦南面坐，議者言皆晉舊事。太子在東宮，西面爲避尊

位。非爲向臺殿也。子才以爲東晉博議依漢魏之舊。太子普臣四海。不以爲嫌。又何疑於東面禮世子。絕旁親。世子冠於冢子。生接以太牢。漢元著令。太子絕馳道。此皆禮同於君。又晉王公世子。攝命臨國。乘七旒安車。駕用三馬。禮同三公。近宋太子乘象輅。皆有同處。不以爲嫌。況東面者。君臣通禮。獨何爲避明。爲向臺所以然也。近皇太子在西林園。在於殿。猶且東面於井城。非宮殿之處。更不得邪。諸人以東面爲尊。宴



會避案燕禮燕義君位在東賓位則在西君位在阼階故有武王踐阼篇不在西也禮乘君之車不敢曠左君在惡室其位左亦在東不在西也君在阼夫人在房鄭注人君尊東也前代及今皇帝宴會接客亦東堂西面若以東面爲貴皇太子以儲后之禮監國之重別第宴臣賓自得申其正位禮者皆東宮臣屬公卿接宴觀禮而已若以西面爲卑實是君之正位太公不肯北面說丹書西面則道之西面乃尊也君位南

面有東有西。何可皆避。且事雖少異。有可相比者。周公臣也。太子子也。周公爲冢宰。太子爲備貳。明堂尊於別第。朝諸侯重於宴。臣賓南面。貴於東面。臣疎於子。冢宰輕於儲貳。周公攝政。得在明堂。南面朝諸侯。今太子監國。不得於別第異宮。東面宴客。情所未安。且君行以太子監國。君宴不以公卿爲賓。明父子無嫌。君臣有嫌。案儀注。親王受詔冠婚。皇子皇女皆東面。今不約王公南面。而獨約太子。何所取邪。議者南尊。改



就西面轉君位更非合禮方面既少難爲節文  
東西二面君臣通用太子宜然於禮爲允

宮吏之姓與太子同名議

案曲禮大夫士之子不與世子同名鄭注云若  
先之生亦不改漢法天子登位布名於天下四  
海之內無不咸避案春秋經衛石惡出奔晉在  
衛侯衎卒之前衎卒其子惡始立明石惡於長  
子同名諸侯長子在一國之內與皇太子於天  
子禮亦不異鄭言先生不改蓋以此義衛石惡

宋向戌皆與君同名。春秋不譏。皇太子雖有儲貳之重。未爲海內所避。何容便改人姓。然事有消息。不得皆同於古。宮吏至微。而有所犯。朝名從事。亦是難安。宜聽出宮尚書。更補他職。

改葬服議

王元軌子欲改葬祖及祖母。列上。未知所服。子才議曰。

禮改葬總麻。鄭玄注。臣爲君。子爲父。妻爲夫。唯三人而已。然嫡曾孫孫承重者。曾祖父母。祖父。母。改葬。旣並三年之服。皆應服總。而止言三人。



若非遺漏便是舉其略耳

訊囚請占議

準舊皆許囚取占然後  
送付廷尉邵以爲不可

設官分職各有司存丞相不問鬪人虞官弓招  
不進豈使尸祝兼刀匕之役家長侵雞犬之功





頌

甘露頌

歷選列辟、逃聽前聞、三才易統、五運相君、皇極攸序、庶類以分、乃忠乃敬、或質或文、

赫矣景命、蒸哉上聖、大德莫名、至道無競、川停岳路、雲臨水鏡、望日齊明、瞻天比映、

功深微禹、業隆作周、英華內積、文教外修、廣輪四海、提封十洲、紫川北注、赤水南流、

宸居兩楹、恭已萬國、聖敬日漸、王猷允塞、禮有

大成樂無慙德、用天之道順帝之則、  
政平民豫、歲稔時和、九功惟敘、九叙惟歌、風輪  
躔漢、毛舟沈河、玉龜出沼、鳴鳳在阿、  
休徵屢動、感極迴天、流甘委素、玉潤冰鮮、蜜房  
下結、珠琲上懸、布濩林野、灑散旌旗、  
日月已明、宇宙已廓、鼓缶成詠、挹水爲樂、以爲  
玄黃、猶參沃若、取慰天壤、用忘溝壑、



銘

文襄金像銘

妙形難象、至理希詮、形之所極、理亦在焉、悟茲  
空假、勞此蓋纏、式圖逞秘、用結來緣、丹青並飾、  
金玉同鑄、神儀內瑩、寶相外宣、圓光照耀、映被  
無邊、靈應眇響、感發大千、鍾福旒纁、其永如天、  
歸慶怙恃、壽等南山、凡厥親類、宜其永年、誠歸  
妙覺、標志上玄、託銘斯在、曠劫方傳、

獻武皇帝寺銘

惟睿作聖、有縱自天、匡國庇民、再造區夏、功高  
伊呂、道邁桓文、雖住止域中、而神遊方外、影響  
妙法、咫尺天人、曉夜自分、不勞鷄鶴之助、六時  
靡惑、非待壺箭之功、永寄將來、傳之不朽、詞曰、  
用分行坐、以敦戒行、苦罪祈福、傲狠成敬、萬國  
咸亨、一人有慶、方傳自久、是用成詠、



廣平王碑

公分氣氤氲，稟靈昭晉，基構輪奐，源流濬遠，積  
石莫之方，委水不能喻，山瀆効神，辰昴降德，自  
天攸縱，鬱爲時宗，墻宇淹曠，標格秀遠，道亞生  
知，德均殆庶，日月在躬，水鏡被物，望青松而比  
秀，干白雲而上征，侍講金華，叅遊銅雀，出陪芝  
蓋，入奉桂室，充會友之選，當拾遺之舉，發言爲  
論，受詔成文，碧鷄自口，靈蛇在握，方見建安之

體復聞正始之音、公年方弱冠、而位居寮右、道  
被生民、惠漸萬物、鬱爲雅俗之表、義成社稷之  
鎮、公孫聲動天下、已非其倫、管子光照鄰國、孰  
云能擬、方謂膺斯多福、降此永年、奪搏風之逸  
羽、窮送日之遠路、同岐山之嘉會、陪岱宗之盛  
禮、而羣飛在辰、橫流具及、山崩川竭、星實日銷、  
崑嶽旣燬、玉石俱燼、蘭挺則芬、玉生則潤、泱泱  
萬源、落落千仞、我有徽猷、金聲玉振、志猶學海、  
業比登山、踟躕緹袞、絳帳韋編、尋微咨奧、數里



入玄天地或終山河匪壽昔日先民誰堪長久  
立言立事責之身後式銘景行是爲不朽

冀州刺史封隆之碑

公世載儒雅之風家傳鐘鼎之業出三代而克  
阜厯兩都而轉盛五世祖游游子孚耻斯鳥獸  
狹此邱壑濡足焚首念在一匡委質中山並充  
袞闕故已援墜拯溺大庇生民祖定功業建旆  
懷藩揚旌冀部耳目相接歌詠獨存父司空孝  
宣公稟潤玉府承華桂簿望振鷺而齊舉軼歸

鴻而並運，以茲一德，光事三主，七登九伯之重，  
再處八元之任，必有餘慶。事屬才子，莫之與京，  
理歸世祿，非因原隰之氣。詎待河岳之靈，發純  
粹而成址，稟中和而樹質。神體秀異，志識閒爽，  
幼體成人，弱不好弄，同鳳凰之五色，非豫章之  
七年。太昌初，平洛除侍中，驃騎大將軍，密勿樞  
功，逶迤袞職。貂蟬承弁，華藻披衣，鳴雙璜於峻  
陛，驅六轡於廣路，升華輦以弼一人，踐泰階而  
平天下。



景明寺碑

九土殊方，四生舛類。昏識異受，修短共時。德表  
生民，不救泰山之朽壤。義同列辟，豈濟灤水之  
淪胥。漂鹵倒戈之勢，浮江駕海之力，孰不曠息，  
相催飛馳，共盡泡沫，不足成喻。風電詎可爲言，  
而皆遷延愛欲，馳逐生死。眷彼深塵，迷茲大夜，  
坐積薪於火宅，負沉石於苦海。結習靡倦，憂畏  
延長，身世其猶夢想。榮辱譬諸幻化，未能照彼  
因緣，體茲空假。祛洗累惑，擯落塵埃。苦器易彫，

危城難久，自發迹有生，會道無上，劫代緬邈，朕  
跡遐長，草木不能，况缺塵沙，莫之比形，日晷停  
流，星光輟運，香雨芴注，甘露上懸，降靈迦衛，擁  
迹忍土，智出須彌，德踰大地，道尊世上，義重天  
中，銘曰

大道何名，至功不器，理有罔適，法無殊致，能以  
託生降體，凡位正覺，如遠一念，斯在德尊三界，  
神感四大，川流自斷，火室不然，衣生寶樹，座踊  
芳蓮，智固有極，道易無邊



并州寺碑

夫至道密微、無跡可覩、神功感應、有理斯存、雖  
慧日已照、而大夜莫曉、香雨時流、而深塵未息、  
曠劫悠緬、厯代遐長、眇眇世羅、無能免其一目、  
汎汎慾網、孰能解其三面、自大教遷流、行於中  
土、希向之士、烟踊沙屬、恒沙未足爲言、積塵所  
不能喻、皆云出沒生死之河、浮沉愛欲之海、未  
有矯然獨悟、脫落身名、望彼岸而攸往、汎寶船  
而利涉

開牛進集

卷全

五



謚議

文宣帝謚議

伏惟聖德光遠，神猷弘大。初自登庸，民譽所集。把尺持刀，成務斯在。百揆載清，四門唯穆。及天眷既屬，人謀所歸。鳥獸遷情，士女革面。敬順天人，拱揖羣后。處無上之尊，居域中之大。禮盛樂修，時和歲稔。海內有截，天下泰然。猶憂勞億兆，經營四國。同虞舜之巡省，若軒轅之靡甯。威武紛紜，神功四暢。怨西以東，化南自北。臨瀚海以

浴兵登天山而繼馬左縈右拂擬歌成章方朝  
百神於太華受萬國於稽嶺升中增封高拱垂  
衣而天喪黎庶奄捐四海考妣之慕實被含生  
稱天作諫抑惟恒數故以名追實盡物未臻其  
美屈道從制一日可以成名



哀策文

文宣帝哀策文

皇路啓扉，輜敢弛殯，八校案部，六卿且引，攀蜃輅而雨泣，仰穹蒼而撫心，悲風發而地駭，愁雲興而景沈，哲王垂範，有訓有則，式奉話言，光敷令德，其辭曰，

四象更運，九天代名，通三以王，得一爲貞，是應立德，實啓蒼精，風后之陳，師尚之兵，三奇六合，七變五成，授戈推轂，稟律襲行，野無完陳，邑少

堅城經營四海，劬勞百姓，芝蓋夕臨，羽旄晨映，  
地不掩瑞，天不愛寶，旣丹其雀，又朱其草，莫黑  
已素，莫赤自皓，百獸斯蹈，五靈載擾，甘露瀼瀼，  
青龍矯矯，武功已暢，文教未窮，方偃烽埃，銷戟  
藏弓，齊光日月，比祚華嵩，而氛稷日下，星闈虛  
中，奄捐朝市長，棄華戎，道宣末命，義闡餘風，六  
綽已散，九旗方卷，見容衛之虛，歸知平生之日，  
遠同乘雲而永逝，異騎龍之更反，清笳奏兮野  
風急，金鼓震兮日光晚，千官悲而雨注，萬國哀



而露法萬事同盡百慮俱收劍鳥永去衣冠自  
遊音儀已謝神教空留知英聲與至德當無絕  
兮千秋

邵持圭集

卷全

哀策

三





太尉韓公墓誌

立事立言、是爲勿替、上公上德、實繫不朽、雖將  
相無種、而公卿有門、是以萬鍾四牡、昌奕於往  
代、長組高冠、陸離於前祀、及負笈追陪、結爰從  
師、先難後易、身佚功倍、皆神遊隅隩、理合精微  
、非存甯越、廢寢食以存道、久殊高鳳、忘冠履以  
成業、皎皎獨照、旁絕囂滓、亭亭孤鶴、入自雲霞  
忘情譽毀、同嗣宗之於善惡、齊心得喪、若叔夜

之於愠喜。方將受在三九。追蹤二八。弘大道以  
事一人。敷至理以安百姓。而天德不厚。神聽多  
愆。仁勇一亡。辯智同盡。

李禮之墓誌

食有奇味。相待乃餐。衣無常主。易之而出。



樂府

思公子

綺羅日減帶、桃李無顏色、思君君未歸、歸來豈  
相識、





詩

三日華林園公宴

迴鑾自樂野，弭蓋屬瑤池。五丞接光景，七友樹  
風儀。芳春時欲遽，覽物惜將移。新萍已冒沼，餘  
花尚滿枝。草滋徑蕪沒，林長山蔽虧。芳筵羅玉  
俎，激水漾金卮。歌聲斷以續，舞袖合還離。

冬夜酬魏少傅直史館

年病從橫至，動息不自安。兼豆未能飽，重裘詎  
解寒。況乃冬之夜，霜氣有餘酸。風音響北牖，月





御熊耳杯折花步淇水、撫琴望叢臺、繁華夙昔  
改、衰病一時來、重以三冬月、愁雲聚復開、天高  
日色淺、林勁鳥聲哀、終風激簷宇、餘雪滿條枚、  
遨遊昔宛洛、踟躕今草萊、時事方去矣、撫已獨  
傷懷、一作懷哉

七夕

盈盈河水側、朝朝長歎息、不恡漸衰苦、波流詎  
可測、秋期忽云至、停梭理容色、束衿未解帶、迴  
鑒已沾軾、不見眼中人、誰堪機上織、願逐青鳥

去、慙因希羽翼

齊韋道遜晚春宴

日斜賓館晚，風輕麥候初。  
簷喧巢慕燕，池躍戲蓮魚。  
石聲隨流響，桐影傍巖疎。  
誰能千里外，獨寄八行書。

應詔甘露詩

膏露且漸洽，凝液汨旌旗。  
草木盡濡被，玉散復珠霏。  
誰謂穹昊遠，道合若應機。

賀老人星詩



瑞動星光照化穆月輪重庾徵符祉錄將以贊

時雍

邵詩進集

卷全

詩

宅





附錄

本傳

邢邵字子才河間鄭人魏太常貞之後父虬魏  
光祿卿邵小字吉少時有避遂不行名年五歲  
魏吏部郎清河崔亮見而奇之曰此子後當大  
成位望通顯十歲便能屬文雅有才思聰明彊  
記日誦萬餘言族兄巒有人倫鑒謂子弟曰宗  
室中有此兒非常人也少在洛陽會天下無事  
與時名勝專以山水遊宴爲娛不暇勤業嘗因

霖雨。乃讀漢書。五日略能遍記之。後因飲譔倦。  
方廣尋經史。五行俱下。一覽便記。無所遺忘。文。  
章典麗。既贍且速。年未二十。名動衣冠。嘗與右。  
北平陽固河東裴伯茂從兄杲河南陸道暉等。  
至北海王昕舍宿飲。相與賦詩。凡數十首。皆在。  
主人奴處。旦日奴行。諸人求詩不得。邵皆爲誦。  
之。諸人有不認詩者。奴還得本。不誤一字。諸人。  
方之王粲吏部尚書隴西李神儁大相欽重。引。  
爲忘年之交。釋巾爲魏宣武挽郎。除奉朝請。遷。



著作佐郎深爲領軍元父所禮父新除遷尚書  
令神儁與陳郡袁翻在席又令邵作謝表須臾  
便成以示諸賓神儁曰邢邵此表足使袁公變  
色孝昌初與黃門侍郎李琰之對典朝儀自孝  
明之後文雅大盛邵雕蟲之美獨步當時每一  
文初出京師爲之紙貴讀誦俄遍遠近于時袁  
翻與范陽祖瑩位望通顯文筆之美見稱先達  
以邵藻思華贍深共嫉之每洛中貴人拜職多  
憑邵爲謝表嘗有一貴勝初授官大集賓食翻

與邵俱在坐。翻意主人託其爲讓表。遂命邵作之。翻甚不悅。每告人云。邢家小兒當客作章表。自買黃紙寫而送之。邵恐爲翻所害。乃辭以疾。屬尚書令元羅出鎮青州。啓爲府司馬。遂在青土。終日酣賞。盡山泉之致。永安初。累遷中書侍郎。所作詔誥。文體宏麗。及爾朱兆入洛。京師擾亂。邵與弘農楊愔避地嵩高山。普泰中。兼給事黃門侍郎。尋爲散騎常侍。太昌初。勅令恒直內省。給御食。令覆按尚書門下事。凡除大官。先問



還鄉詔所在特給兵力五人并令歲一入朝以備顧問丁母憂哀毀過禮後楊愔與魏收及邵請置學及修立明堂勅有司別議經始累遷太常卿中書監攝國子祭酒是時朝臣多守一職帶領二官甚少邵頓居三職並是文學之首當世榮之世宗幸晉陽路中頻有甘露之瑞朝臣皆作甘露頌尚書符令邵爲之序及文宣皇帝崩凶禮多見訊訪勅撰哀策後授特進卒邵率

情簡素。內行修謹。兄弟親姻之間。稱爲雍睦。博覽墳籍。無不通曉。晚年尤以五經章句爲意。窮其指要。吉凶禮儀。公私咨稟。質疑去惑。爲世指南。每公卿會議。事關典政。邵援筆立成。證引該洽。帝命朝章。取定俄頃。詞致宏遠。獨步當時。與濟陰溫子昇爲文士之冠。世論謂之溫邢。鉅鹿魏收。雖天才艷發。而年事在二人之後。故子昇死後。方稱邢魏焉。雖望實兼重。不才位傲物脫略簡易。不修威儀。車服器用。充事而已。有齊



不居坐臥恒在一小屋身館之屬可置之旁上  
賓至下而共噉天姿質素特安異同士無賢愚  
皆能顧接對客或解衣覓蝨且與劇談有書甚  
多而不甚讐校見人校書常笑曰何愚之甚天  
下書至死讀不可遍焉能始復校此且誤書思  
之更是一適妻弟李季節才學之士謂子才曰  
世間人多不聰明思誤書何由能得子才曰若  
思不能得便不勞讀書與婦甚疎未嘗內宿自  
云嘗晝入內閣爲狗所吠言畢便撫手大笑性

好談賞。不能閑獨。公事歸休。恒須賓客。自伴事寡嫂甚謹。養孤子。恕慈愛特深。在兗州有都信云。恕疾便憂之。廢寢食。顏色貶損。及卒。人士爲之傷心。痛悼。雖甚。竟不再哭。賓客吊慰。拭淚而已。其高情達識。開遣滯累。東吳以還。所未有也。有集三十卷。見行於世。子大寶有文情。孽子大德。大道路略不識字焉。



醫藥類

魏

特

進

集



魏特進集題詞

魏伯起少慚弄戟終免逐兔文章大  
手激成于調笑一言鄭伯誠有功哉  
魏書失實穢史流謗然拮據宏博實  
當時偉作論邢魏者以魏彷彿任樂安  
邢彷彿隱侯余謂伯起生平文體得

之樂安固多若問史才隱侯宋書亦  
其兄事也魏帝大射令群臣賦詩伯  
起有尺書徵建鄴折簡召長安之句  
高文襄壯之稱國光彩侯景寇叛伯  
起草檄氣雄萬夫至言景竦悖棄若  
孤雛母戀戀亂臣勤勤賊子直南朝



藥石豈止騰聲北土哉魏齊文詒典  
司最久世罕流傳作賦大才雅自期  
許乃新殿南狩庭竹離懷諸篇亦未  
得見使無魏書幾無以表著後代矣  
且謗深陳壽而福踰崔浩尤從來史  
官之極幸者也

婁東張溥題



魏特進集目錄

詔

爲武成帝以三臺宮爲大興聖寺詔

爲魏禪齊詔

爲齊文宣西討詔

冊文

加齊王九錫冊文

禪齊帝冊文

啓

上魏書十志啓

移文

爲侯景叛移梁朝文

爲東魏檄梁文

書

與李德林書

重遣李德林書

議

皇太子西面議



文

枕中篇

爲齊卽位告天文

北齊三部一切經願文

祭文

祭荊州刺史陰道方文

樂府

美女篇

永世樂

權歌行

挾琴歌

詩

後園宴樂

喜雨

看柳上鵲

晦日泛舟應詔

月下秋宴

五日



庭栢

蜡節

附錄

本傳

魏特進集目錄終

魏特進集

目錄

三





魏特進集卷全

齊鉅鹿魏收伯起著

明太倉張溥天如閱

詔

爲武成帝以三臺宮爲大興聖寺詔

門下皇居帝邑揆日瞻星仍雉有常几席斯在  
雖今古推移文質代變而成世作範義貴適時  
朕奄家四海作孚萬國當陽負宸深存庇厖濟  
下利物無忘懷抱昭仁訓俗不遺造次今臨嚮

聽朝咸極崇廣、宴息之所、不足溫華、每謂爲之者勞、居之者逸、至於離宮別館、有時遊幸、耳目所及、聊可忘懷、而乃千門洞啓、萬柱周架、上迫雲漢、下臨雷雨、巧極金銅、麗殫珠璧、眷然長想、良非宿心、三臺竝列、蕪穢自久、天保之末、經構甫興、仍創棟宇、規模宏博、有司過實、匠人逞功、氓庶勞止、糜費難量、旣非殿寢正所、便爲虛衛之地、凝華生白、經歷歲年、不剪茅茨、事頗逼下、卑其宮室、有可庶幾、顧茲侈麗、豈伊甯處、自魏



朝失政九域崩離人神無主實求明聖我太祖  
獻武皇帝握茲乾紀執斯地綱懸持日月嘯咤  
風雲紀忠貞以成務感靈徵而大造爰以克定  
之初躬圖道場之業神迹冥果理燭幽明朕嗣  
膺寶祚永惟家祉仰祗先志尚竦玄門忍展聿  
修之重念歸喜捨之大肌膚匪恡國城何寶期  
濟率土至於圓極可以三臺宮爲大興聖寺此  
處極土木之壯窮丹素之妍奇怪備於刻削光  
華畢於圓彩顧使靈心旂嚮神物奔會真覺唯

寂有感必通化爲淨土廣延德衆心若瑠璃法輪常轉灑甘露於大千照慈燈於曠劫

爲魏禪齊詔

三才剖判百王代興治天靜地和神敬鬼庇民造物咸自靈符非一人之大寶實有道之神器昔我祖宗應運奄一區宇厯聖重光繫於九葉德之不嗣仍離屯圯盜名字者遍於九服擅制命者非止三公主殺朝危人神靡繫天下之大將非魏有賴齊獻武王奮揚靈武剋剪多難重



懸日月更綴參辰廟以掃除國由再造鴻勲巨  
業無德而稱逮文襄承構世業逾廣邇安遠服  
海內晏如國命已康生生得性迄相國齊王緯  
文經武統茲大業盡叡窮幾研深測化思隨冥  
運智與神行恩比春天威同夏日坦至心於萬  
物被大道於八方故百僚師師朝無秕政網疏  
澤洽率土歸心外盡江淮風靡屈膝辟地懷人  
百城奔走闕隴慕義而請好瀚漠仰德而致誠  
伊所謂命世應期寔撫千載禎符雜遝異物同

途謳頌填委殊方一致代終之迹斯表人靈之  
契已合天道不遠我不獨知朕入纂鴻休將承  
世祀籍援立之厚延宗社之算靜言大運欣於  
避賢遠惟唐虞禪代之典近想魏晉揖讓之風  
其可昧興替之禮稽神祇之望今便遜於別宮  
歸帝位於齊國推聖與能眇符前軌王者宣布  
天下以時施行

爲齊文宣西討詔

朕歷數在躬志清四方葛爾秦隴久阻風化混



一之事期在今日必當訪放誓衆天重雲臨用  
已下甲汾流沈船晉地便當躬率將士平陵王  
壁徑掩長安梟彼兇首雖藏山沒水終不縱赦  
朕與梁國舊敦好睦近聞其奸乃欲規謀宜令  
上黨王渙總勒熊羆星流風卷王者之言明如  
日月宜宣內外咸使聞知





冊

加齊王九錫冊文

於戲敬聽朕命夫唯天爲大列晷宿而垂象謂  
地蓋厚疏川嶽以阜物所以四時代序萬類駢  
羅庶品得性羣形不夭然則皇王統厯深視高  
居拱默垂衣寄成師相此則夏伯殷尹竭其股  
肱周成漢昭無爲而治頃者天下多難國命如  
旒則我建國之業將墜於地齊獻武王奮迅風  
雲大濟艱危爰翼朕躬國爲再造經營庶土以

至勤憂及文襄承構，愈廣前業，康邦夷難，道格  
穹蒼。王縱德應期，千齡一出，惟幾惟深，乃神乃  
聖。大崇霸德，寔廣相猷。雖冥功妙實，藐絕言象，  
標聲示迹，典禮宣宣。今申後命，其敬虛受。王搏  
風初舉，建旗上地。庇民立政，時雨滂流。下識廉  
耻，仁加水陸。移風易俗，自齊變魯。此王之功也。  
仍攝天臺，總參戎律。策出若神，威行朔土。引弓  
竄跡，松塞無烟。此又王之功也。逮光統前緒，持  
衡匡合，華戎混一。風海調夷，日月光華，天地清



晏聲接響，隨無思不偃。此又王之功也。迺矣。炎  
方逋違，正朔懷文，曜武授略，申規淮楚，連城濯  
然，桑落。此又王之功也。關峴衿帶，跨躡蕭條，腸  
胃之地，嶽立鵠峙，偏師纔指，渙同冰散。此又王  
之功也。晉熙之所，險薄江雷，迴隔聲教，迷方未  
改，命將鞠旅，覆其巢穴，威畧風騰，傾懾南海。此  
又王之功也。羣蠻跋扈，世絕南疆，搖蕩邊陲，亟  
爲塵梗，懷德畏威，向風請順，傾圯盡落，其至如  
雲。此又王之功也。胡人別種，延蔓山谷，酋渠萬

旅廣袤千里，憑險不恭，恣其桀黠，有樂淳風，相  
攜叩款，粟帛之調，王府充積，此又王之功也。茫  
茫涉海，世敵諸華，風行鳥逝，倏來忽往，旣飲醇  
醪，附同膠漆，璫裘委仞，奇獸銜尾，此又王之功  
也。秦川尚阻，作我仇讐，爰挹椒蘭，飛書請好，天  
動其衷，辭卑禮厚，區宇乂甯，遐邇畢至，此又王  
之功也。江陰告禍，民無適歸，蕭宗子弟，尚相投  
庇，如鳥還山，猶川赴海，荆江十部，俄而獻割，乘  
此會也將混來方，此又王之功也。天平地成，率



土咸茂、禎符顯、見史不停筆、旣連百木、兼呈九  
尾、素過秦雀、蒼比周烏、此又王之功也、搜揚管  
庫、衣冠獲序、禮云樂云、銷沉俱振、輕徭徹賦、矜  
獄寬刑、大信外彰、深仁遠洽、此又王之功也、王  
有安日下之大勳、加以表光明之盛德、宣贊洪  
猷、以左右朕言、昔旦奭外分、毛畢入佐、出內之  
任、王宜總之、人謀鬼謀、兩儀協契、錫命之行、義  
申公道、以王踐律、蹈禮軌、物蒼生、圓首安志、率  
心歸道、是以錫王大路、戎路各一、玄牡二駟、王

深重民天唯本是務衣食之用榮辱所由是用  
錫王袞冕之服赤舄副焉王深廣惠和易調風  
化神祇且格功德可象是用錫王軒懸之樂六  
佾之舞王風聲振赫九域咸綏遠人率俾奔走  
委賚是用錫王朱戶以居王求賢選衆草萊以  
盡陳力就列罔非其人是用錫王納陛以登王  
英圖猛繫抑揚千品毅然之節肅是非違是用  
錫王武賁之士三百人王興亡所繫制極幽顯  
紕行天討罪人咸得是用錫王鈇鉞各一王鷹



揚豹變實扶下土狼顧鴟張罔不彈射是用錫  
王彤弓一彤矢百盧弓十盧矢千王孝悌之至  
通於神明率民興行感達區宇是用錫王秬鬯  
一卣珪瓚副焉往欽哉其祇順往冊保弼皇家  
用終爾休德對揚我太祖之顯命

禪齊帝冊文

咨爾相國齊王夫氣分形化物繫君長皇王遞  
興人非一姓昔放勳馭世沉璧投珠重華握歷  
持衡擁璇所以英賢茂實昭晰千古豈盛衰有

運興廢在時知命不得不授畏天不可不受是  
故漢劉告否當塗順民曹歷不永金行納禪此  
皆重規襲矩率由舊章者也我祖宗光宅混一  
萬寓迄於正光之末奸孽乘權厥政多僻九域  
離盪永安運窮人羈殄瘁羣逆滔天割裂四海  
國土臣民行非魏有齊獻武王應期授手鳳舉  
龍驤興廢極以立天扶傾柱而鎮地剪滅黎毒  
匡我墜歷有大德於魏室被博利於蒼生及文  
襄繼軌誕光前業內勦凶權外摧侵叛遐邇肅



晏功格上玄王神祇協德舟梁一世體文昭武  
追變窮微自舉跡藩旗頌歌摠集入統機衡風  
猷弘遠及大承世業扶國昌家相德日躋霸風  
愈邈威靈斯暢則荒遠犇馳聲略所播而鄰敵  
順欵以富有之資運英特之氣顧盼之間無思  
不服圖牒潛蘊千祀彰明嘉禎幽秘一朝紛委  
以表代德之期用啓興邦之迹蒼蒼在上照臨  
不遠朕以虛昧猶未逡巡靜言愧之坐而待旦  
且時來運往矯舜不暇以富陽世革命改伯禹

不容於北面、況於寡薄而可踟蹰、是以仰協穹  
昊、俯從百姓、敬以帝位、式授於王、天祿永終、大  
命格矣、於戲、其祗承、歷數、允執其中、對揚天休、  
斯年千萬、豈不盛歟、



啓

上魏書十志啓

臣收等啓。昔子長命世偉才。孟堅冠時特秀。憲章前詰。裁勒墳史。紀傳之間。申以書志。緒言餘迹。可得而聞。叔峻刪緝。後劉紹統。削撰季漢。十志實範。遷固表蓋闕焉。曹氏一代之籍。了無具體。典午終世之筆。罕云周洽。假復事播四夷。盜聽間有。小道俗言。要奇好異。考之雅舊。咸乖實錄。自永嘉喪圯。中原淆然。偏僞小書。殆無可取。

魏有天下，跨踪前載，順末克讓，善始令終。陛下  
極聖窮神，奉人屈已，顧盼百皇，指掌萬世，深存  
有魏撫運之業，永念神州人倫之緒。臣等肅奉  
明詔，刊著魏籍，編紀次傳，備聞天旨，竊謂志之  
爲用，網羅遺逸，載紀不可。附傳非宜，理切必在  
甄明。事重尤應標著，搜獵上下，總括代終，置之  
衆篇之後。一統天人之迹，褊心末識，輒在於此。  
是以晚始撰錄，彌歷炎涼，採舊增新，今乃斷筆。  
時移世易，理不刻船，登閣含毫，論敘殊致，河溝



往時之切。釋老當今之重。藝文前志可尋。官氏  
魏代之急。去彼取此。敢率愚心。謹成十志。二十  
卷。請續於傳末。并前例目合一百三十一卷。臣  
等妨官秉筆。迄無可採。塵黷旒冕。墮深氷谷。謹  
啓





# 移文

## 爲侯景叛移梁朝文

夫化成萬物、分界九道、紀之以山河、照之以日月、方足圓首、含氣呈形、咸總之於聖人、畢會之以朝市、皇魏應銜甲之祕圖、納封金之寶命、萬方爲宅、四海爲家、卜世靈長、將踰八百、天壤之間、朝不別焉、唯夫三江五湖、九蠻百濮、其地如掌、人鳥未分、瞻星昧環拱之方、托水迷朝宗之義、積蠅爲衆、長蛇稱長、石田無菽粟之用、衆人

非聲教所孚。是以年厯三僞。棄而不有。豈力不足。蓋所未徵。而陸梁塗泥。時軼疆鄙。天討所遺。理存惡殺。自二紀及茲。中原多故。未清區宇。文武兼勤。偃伯歸戰。有懷勞止。將令動植俱仰。堯心遂冠。蓋括途象胥。提告推誠。蹶然類識。王道授衣禮節。拜首歸仁。舞戚所以爲高。止戈故能稱大。方知風沙交臂。不待兵車。有苗納款。未勞征伐。而庸夫爲善。希能令終。狂人克念。更知徒語。聞利無匹夫之信。好虐有助鬼之心。白頭爲



賊曾莫自揆。嘉文浮功。甘於苟得。罔顧榆次之禍。詎識江浦之禽。侯景一豎微蔑。民斯下矣。人倫士操。本自不倫。直以少從羈勒。頗習趨走。叨忝名器。事出爾朱。藏情諂笑。唯利是視。義兵同舉。羣胡覆族。雖狐祭首邱。事非小人。而忘恩背本。景爲先至。不義不信。自此可知。但丁公之戮。時有未可也。大澤深山。龍蛇並育。遂容其悔非。棄其瑕穢。任以將率。授以兵符。庶其被鞍銜鍊。盡力馳驟。指踪投繯。驚兔或擒。而弱才負重。折

足是慮置之不爭之地，虛出韓鄭之間，曾無戰  
伐之勤，可言摧陷之績。歲往年徂，率無可紀。而  
腹心羣小，信納逋亡，劫奪行道，侵掠民庶，流聲  
遠聞。王法有典，驄馬將出，朱筆且行。自貽伊戚，  
了不知咎。盜憎主人，乃圖逆節，拔本塞源，委身  
賊虜，逼脇居民，翻蕩城池，叉手曲躬，千里唯諾。  
殘賊相依，忻同鱗水，寵以大位，屬以東方。外曰  
臣主，內深骨肉，安危契濶，約以死生，拯其鼎鑊，  
之命全其薨粉之福。時不暇浹，翻然易慮，還相



掩擊事劇仇讐反覆剽獲莫非此類。至於老母  
暮倚少弟升岡。妻望行夫子號出父。食毛之屬。  
可爲痛心哉。景忽之如草芥。棄之如塵垢。任其  
斲截之誅。安其烹斬之痛。放麀食子。有以可親。  
觀臧窮否。耻其並主。獸心人面。華裔同讐。歸家  
懼執法之刑。赴賊反噬。臍之釁。首領無地。進退  
數窮。遂騁邪說。自託左右。苟有君子。義均逐雀。  
而彼方上下。樂禍好亂。叛竊之監。獲毒之人。圖  
浮芥之小利。忘邱山之大禍。乃崇飾土偶。被以

玄黃馳馬高蓋載驄爲重委以專征施其爪角  
驅逼子姓率我叛亡逼厭虐之侶鞠苦後之衆  
蟻攢蚋集侵竊邊鄙恤患分災本不要於違僻  
違衆悖禮蓋神明之所誅皇帝垂旒華土則天  
而動卷覆三古懷佩百王掌握中道崇基增構  
殊塗仝會百慮一歸中外禔福戎華俱庇持秋  
霜夏震之威以拔山超海之力顧指則風雲總  
至迴眸而山嶽削平雖復旗鼓所臨有征無戰  
猶以師出而服辱在我世所務者息民所存者



文德。豈復以擒將威敵。漂杵溺驂。爲功於一時。  
示武於千載。且天生五材。有聞前古。禍非我貽。  
其得已乎。遂置壇命將。持柯畢禮。引營就道。分  
途競馳。批熊舉輪之士。翹關扛鼎之卒。被組橫  
矛。執殳挺劍。龍駒並躍。驥子千羣。沸聒天壤。蒸  
鬱雲霄。一朝指揮。倏忽千里。候騎羅絡。聊逞前  
驅。天兵之鼓未鳴。衆軍之旗詎接。而荆揚烏合。  
一朝崩解。塞州滿塗。馘耳截鼻。以千萬計。不可  
勝數。宗親節將。咸見擒束。委命軍吏。憂在釁鼓。

楚兵吳甲，積若山邱，青鵲赤烏，噎流斷岍。千金之貴，爲我資焉。痛辱可哀，其利安在？覆師喪旅，禍本可尋。方之噬臍，悔之靡及。皆侯景叛戾，虛相陷誘，指成提挈之舉，終無犄角之勢。景棄本趨末，背國違鄉，部下數千，屈逼羅網，離親懷土。一日三秋，拘網立匏。朝不謀夕，豈能搖足東上，遠赴彭城？天奪彼魄，信納虛詭，使蕭明貴孫，面縛於徐泗，景爲凶藪，逡巡而坐觀。託人七尺之身，居人成敗之地。急病讓醫，固若此也。兩端自



見故態未除。今知東南滌蕩。睢潼清復。梁之喪  
師。單輪不返。擊援之期。終當無日。勢窮路盡。憂  
在滅亡。事留變生。將謀及已。且彼軍殲殄。江淮  
屠酷。禍源彙迹。景實爲之上。懼金陵君長致請。  
設之責下。恐荆吳子弟洗父兄之冤。愚小猜驚。  
將興異計。乘專任之機。藉方面之重。必當招結。  
僉楚。易合無賴。內自封植。外絕防禦。因見信而  
類起。出不疑以竊發。事比疾雷。理同激矢。上或  
憑陵乘疾。專擅縱橫。下則鴟峙淮淝。覬覦叛渙。

老疾姦回。不虛然也。而彼土區區。厚加崇納。置之襟帶之方處。以藩籬之所。費金帛於烈火。罄酒漿於漏卮。非乘景虛聲。委其實用。夫量材授任。必原其始。考行責成。當存其大。景豺聲蜂目之首。狼心狐魅之徒。義無父子。棄同卽異。捐親背德。於我尚反目而去。在梁則何施可懷。且我重傷心。尾大不掉。魚脫於淵。義彰老氏。而假威凶險。授柄姦回。欲求肝膽之誠。更啓危亡之兆。固智者不爲。迷者遂去。若抽薪止沸。剪草除根。



壺首囊頭。叉手械足。返國姦於司敗。歸侵地於  
玄武。非直惡之在今。天道人事。實棄無禮。苟違  
之者。其長世何。若悔非知罪。恭承德音。且欲飛  
驛合符。班師凱入。悠悠水鄉。有救其死。若乃執  
飾非之辨。固遂過之失。便當盡常勝之戰。極必  
取之攻。飛江南渡。深山將恐削壤卑名。雖頓顙  
而不獲。亡宗滅廟。望喬木而可悲。昔田假英人。  
於期壯士。窮而歸。我許以入懷。景竦悖狗。子攪  
亂四國。庸可紓難。棄若孤鷗。何足戀戀於亂臣。

勤○勤○於○賊○子○也○王○者○之○威○心○厲○如○霜○雪○信○同○寒  
暑○言○猶○麗○天○移○至○深○念○變○通○熟○量○可○否○幸○思○大  
雅○無○貽○後○悔○

爲東魏檄梁文

觀夫辰象麗天、山岳鎮地、方以類聚、物以羣分、  
建之以邦國、樹之以君長、日月於是莫二、宇宙  
所以總一、雖五運相推、百王革命、此道之一作所  
行、孰之能改、一作孰云能易而皇家承統、光配彼天、義  
洽幽明、化周動植、崇文德以來遠、修禮讓以止



訟舞干戚於兩階。執玉帛於萬國。立功潛運。至德旁通。百姓日用而不知。兆民受賜而無迹。唯彼吳越。獨阻聲教。匪民之咎。責有由焉。而元首懷止戈之心。上宰薄兵車之會。遂解繫南冠。喻以好睦。舟車遵沂。州陸同光。亭檄息犇走之勞。屯戍無逼卒之變。雖嘉謨長筭。爰自我始。而罷兵息民。彼獲其利。侯景豎子。本無事業。乃枉道於人間。遂乾沒於世上。鳴吠於爾朱之門。鎮守於普泰之日。曾無爲主之識。詎有挈瓶之智。旣

而投命義旗歸身幕府殊異雍齒有類丁公時  
逢寬政得免大戮棄其瑕滓收其力用預在行  
伍參跡驅馳及秦隴逋誅每事經略以河南是  
空虛之地漢陽非兵戰之衝薄存犄角聊示旗  
鼓豈資實効寄以遊聲軍機催勒蓋維景任總  
兵統旅則有司存而愚褊有積驕憤遂甚屢犯  
軍紀自生疑貳禍心潛構翻成亂階負恩棄德  
罔恤天討不義不昵厚而必顛委慈母似脫屣  
棄寵弟如遺芥龍鍾稚子痛苦成行嬖彼諸姪



破亡爲伍。滅伯春之婉轉。慕姜兒之爽言。不與  
狼虎同仁。而其豺狸等惡。及遠託關隴。依憑姦  
異。逆主定君臣之分。賊臣結兄弟之親。解其倒  
懸。仰人鼻息。豈曰無恩。終成難養。俄而易慮。躬  
環干戈。釁暴惡盈。側首無託。以金陵逋逃之藪。  
江南統御一作離之地。甘辭卑體。進熟圖身。讒言  
浮說。抑可知矣。叛監投命。豈將擇音。而僞朝大  
小。幸災忘義。主荒於上。臣蔽於下。逐雀去草。曾  
不是圖。竊寶叛邑。椒蘭比好。人而無禮。其能國

乎亦既失信、不亡何待、今帝道休明、皇猷允塞、  
四民樂業、百靈効祉、故丞相材標國楨、道潤時  
雨、義冠伊霍、勲蓋桓文、大君立德、世功世祿、作  
民舟楫、爲國棟梁、內外齊心、上下同德、蛟騰虎  
嘯、風生雲起、摩日則車懸、轉舍排山則龍門洞  
開、吞雲夢於胷中、運天下於掌內、雖有賊臣去  
國、亡卒出境、何異一毛之落、牛體雙鳧之飛、海  
曲、彼旣連結姦惡、斷絕鄰好、追兵保境、縱盜侵  
國、益物無定方、事無常勢、或乘利而受害、或因



得而更失。是以吳侵齊境。遂致勾踐之師。趙納韓地。終有長平之役。矧乃鞭撻疲民。侵軼徐部。築壘擁川。捨信邀利。此而可忍。孰不可懷。是以援乘麾旗之將。投石拔距之士。深衛僞主。信納亡叛。含怒作色。如赴私讐。意存涉血。義不旋踵。攻戰之利。實若有神。徵兵聚衆。依山傍水。舉螳螂之斧。被蛄蜺之甲。當窮轍以待輪。坐積薪而候燎。及其鋒刃。蹙援埃塵。旦接便已。亡戟棄戈。土崩瓦解。貞陽以從。一作猶子之親。爲戎首之任。

非獨

一作但

力屈道窮亦將無路還蜀兼亦

復一作

挾子垂翅俱在籠樊將士以昧禍之心爲助亂之事皆掬指舟中披甲鼓下同宗異姓纍纍相望曲直旣殊強弱不等父出子孤自取其敗違卜復諫何以辭責雖復貪利苟得背同卽異獲一人而失一國見黃雀而忘深穽食鈎吻以療饑飲鳩毒以救渴智者所不爲仁者所不向誠旣往之難逮猶將來之可追景以鄙俚之夫遭風雲之會位登三事邑啓萬家揣身量分久當



止足而周章向背離披不已天豈徒然意亦可  
見彼乃示之以利器誨之以慢藏使其勢得容  
姦令其時堪乘便旣南風不競天亡有徵老賊  
姦謀將復作矣然則摧堅强者難爲功拉枯朽  
者易爲力計其雖非孫吳猛將燕趙精兵猶是  
久涉行陣曾習軍旅豈同輕剽之師不比危脆  
之衆距一作拒此則作氣不足攻彼則爲勢有餘  
恐尾大於身踵麤於股倔強不掉狼戾難馴呼  
之則反速而釁小不徵則叛遲而禍大會應遙

望廷尉不肯爲臣。自據淮南亦欲稱帝。但恐楚

國亡猿禍延林木。城門失火殃及池魚。橫使漢

江

一作黃

士子荆揚人物死亡矢石之下。支

一作天

折露霧之中。彼梁主操行無聞。輕險有素。工用其短。以少爲多。反覆山淵。顛倒冠履。射爵論功。盪舟稱力。年旣老矣。耄又及之。政荒民流。禮崩樂壞。改換朝章。變易官品。雖世異漢朝。而事同新室。加以用捨乖方。立廢失所。矯情動衆。飾智

驚思。毒螫滿懷。妄敦戒業。躁競盈胸。謬治清淨。



內恣鴟靡外逞殘賊人人厭苦家家思亂災異  
降於上怨讟興於下履霜有漸堅冰且至恃浮  
一作將險躁之風俗任輕薄之子孫朋黨路開兵權  
在外必將禍生骨肉難起腹心強弩衝城長戟  
指闕徒探雀穀無救府藏之虛空伺熊蹯詎延  
晷刻之命外崩中潰今實其時鷸蚌相危一作扼  
我乘其弊方使高旗舒旆長轂啓行迅騎追風  
精甲耀日四七竝列百萬爲羣風飄雲動星羅  
海運以此赴敵何敵不摧以此攻城何城不陷

猶爲岸上之虎。當作水中之龍。以轉石之形。爲破竹之勢。將使鍾山渡江。青蓋入洛。荆棘生建業之宮。麋鹿遊姑蘇之館。但恐兵車之所轡轢。劒騎之所蹈踐。杞梓於焉傾折。竹箭以此摧殘。若吳之王孫。蜀之公子。順時以動。見機而作。面縛銜璧。肉袒牽羊。歸款軍門。委命下吏。當使焚櫬而出。拂席相待。必以楚材。將爲晉用。固乃喜得異度。實自利獲士衡。士龍。卽援客卿之族。將加驃騎之號。斯蓋壯士封侯之日。丈夫立節之



秋冬冰可折。時不再來。先事預懷。有如皎日。王  
侯無種。工拙在人。凡百君子。勉求多福。若不改  
迷。坐待淪沒。一旦暴骨草莽。流血成川。猶且不  
悟。噬臍何及。故宣往意。馳此簡書。檄之到彼。咸  
共申省。此作是杜弼所製據藝文稱魏叔作今姑存之





書

與李德林書

收與陽休之論齊書起元事  
勅集百司會議收與德林書

前者議文總諸事意小如混湯難可領解今便  
隨事條列幸爲留懷細加推逐凡言或者皆是  
敵人之議旣聞人說因而探論耳

重遣李德林書

惠示二事感佩殊深以魯公諸侯之事昨小爲  
疑息姑不書卽位舜禹亦不言卽位息姑雖攝

尚得書元。舜禹之攝。稱元理也。周公居攝。乃云  
一年救亂。似不稱元。自無大傳。不得尋討一之  
與元。其事何別。更有所見。幸請論之。



議

皇太子西面議

天保元年皇太子監國在西林園冬會羣  
議皆東面二年於北城第內冬會又議東  
面陸卬疑非禮  
魏收改爲西面

去天保初皇太子監國冬會羣官於西園都亭  
坐從東面義取於向中宮臺殿故也二年於宮  
冬會坐乃東面某竊以爲疑前者遂有別議議  
者同之邢尚書以前定東面之議復申本懷此  
乃國之大禮無容不盡所見收以爲太子東宮

位在於震、長子之義也。案易八卦正位向中、皇太子今居北城、於宮殿爲東北、南面而坐、於義爲背也。前者立議、據東宮爲本、又案東宮舊事、太子宴會、多以西面爲禮、此又成證、非徒言也。不言太子常無東南二面之坐、但用之有所至、如西園東面、所不疑也。未知君臣車服有同異之議、爲而發、就如所云、但知禮有同者、不可令異、不知禮有異者、不可令同、苟別君臣同異之禮、恐重紙累札、書不盡也。



文

枕中篇

收以子弟少年申以戒厲著枕中篇

吾曾覽管子之書其言曰任之重者莫如身途之畏者莫如口期之遠者莫如年以重任行畏途至遠期惟君子爲能及矣追而味之喟然長息若夫嶽立爲重有潛戴而不傾山藏稱固亦趨負而弗停呂梁獨浚能行歌而匪惕焦原作險或躋踵而不驚九陔方集故眇然而迅舉五

紀當定、想宵乎而上征、苟任重也有度、則任之而愈固、乘危也有術、蓋乘之而靡恤、彼其遠而能通、果應之而可必、豈神理之獨爾、亦人事其如一、嗚呼、處天壤之間、勞死生之地、攻之以嗜欲、牽之以名利、梁肉不期而共臻、珠玉無足而俱致、於是乎驕奢仍作、危亡旋至、然則上智大賢、唯幾唯哲、或出或處、不常其節、其舒也濟世成務、其卷也聲銷迹滅、玉帛子女、椒蘭律呂、諂諛無所、先稱肉度骨、膏脣挑舌、惡怨莫之前勲、



名共山河同久。志業與金石比堅。斯蓋厚棟不  
撓。遊刃砉然。逮於厥德不常。喪其金璞。馳騫人  
世。鼓動流俗。挾湯日而謂寒。包嶮壑而未足源。  
不清而流濁。表不端而影曲。嗟乎膠漆謂堅。寒  
暑甚促。反利而成害。化榮而就辱。欣戚更來。得  
喪仍續。至有身禦魑魅。寃沉狴獄。詎非足力不  
彊。迷在當局。孰可謂車戒前傾。人師先覺。聞諸  
君子雅道之士。遊遨經術。厭飫文史。筆有奇鋒。  
談有勝理。孝悌之至。神明通矣。審道而行。量路

而止自我及物先人後已情無繫於榮悴心靡  
滯於愠喜不養望於邱壑不待價於城市言行  
相顧慎終猶始有一於斯鬱爲羽儀恪居展事  
知無不爲或左或右則髦士攸宜無悔無吝故  
高而不危異乎勇進忘退苟得患失射千金之  
產邀萬鍾之秩投烈風之門趣炎火之室載蹶  
而墜其貽宴或蹲乃喪其貞吉可不畏歟可不  
戒歟門有倚禍事不可不密牆有伏寇言不可  
而失宜諦其言宜端其行言之不善行之不正



鬼執彊梁人四徑延幽奪其魄明天其命不服  
非法不行非道公鼎爲已信私玉非身寶過緇  
爲紺踰藍作青持繩視直置水觀平時然後取  
未若無欲知止知足庶免於辱是以爲必察其  
幾舉必慎於微知幾慮微斯亡則稀旣察且慎  
福祿攸歸昔蘧瑗識四十九非顏子幾三月不  
違跬步無已至于千里覆一簣進及於萬仞故  
云行遠自邇登高自卑可大可久與世推移月  
滿如規後夜則虧槿榮於枝望暮而萎夫奚益

而非損孰有損而不害益不欲多利不欲大唯  
居德者畏其甚體真者懼其大道尊則羣謗集  
任重而衆怨會其達也則尼父栖遑其忠也而  
周公狼狽無曰人之我狹在我不可而覆無曰  
人之我厚在我不可而咎如山之大無不有也  
如谷之虛無不受也能剛能柔重可負也能信  
能順險可走也能知能愚期可久也周廟之人  
三緘其口漏卮在前欹器留後俾諸來裔傳之  
座右



爲齊卽位告天文

皇帝臣諱敢用玄牡昭告於皇皇后帝否泰相  
沿廢興迭用至道無親應運斯輔上覽唐虞下  
稽魏晉莫不先天揖讓考厯歸終魏氏多難年  
將三十孝昌已後內外去之世道橫流蒼生塗  
炭賴我獻武拯其將溺三建元首再立宗祧掃  
絕羣凶芟夷奸宄德被黔黎勳光宇宙文襄嗣  
武尅構鴻基功浹寰宇威稜海外窮髮懷音西  
寇納款青邱保侯丹穴來庭扶翼危機重匡頽

運是則有大造於魏室也。魏帝以卜世告終，上  
靈厭德，欽若昊天，允歸大命，以禪於臣諱。夫四  
海至公，天下爲一，總民宰世，樹之以君。旣川嶽  
啓符，人神效祉，羣公卿士，八方兆庶，僉曰：皇極  
乃顧於上，魏朝推進於下，天位不可以暫虛，遂  
逼羣議，恭膺大典，猥以寡薄，託於兆民之上。雖  
天威在顏，咫尺無遠，循躬自省，實懷祗惕，敬簡  
元辰，升壇受禪，肆類上帝，以荅萬國之心。永隆  
嘉祉，保佑有齊，以被於無窮之祚。



北齊三部一切經願文

三有分區四生稟性共遊火宅俱淪欲海所以  
法王當洲渚之運覺者應車乘之期導彼沈迷  
歸茲勝地自寶雲西映法河東瀉甘露橫流隨  
風感授皇家統天尊道崇法拔羣品於有待驅  
衆生於不二所以刻檀作續構石彫金遍於萬  
國塵沙數等復詔司存有事緇素精誠踰於皮  
骨句偈盡於龍宮金口所宣總勒繕寫各有三  
部合若干卷用此功德心若虛空以平等施無

思不洽藉我願力同登上果



# 祭文

## 祭荊州刺史陰道方文

維太昌元年十二月庚申朔越十二日辛未友人鉅鹿魏收謹以清酌少牢之饌敬祭于荊州刺史陰君之靈嗚呼哀哉惟君世載不殞英聲在茲風流有屬自爾弘之孝爲行本忠實身基旣言斯立罄禮窮詩器則清賞才惟英博於暢風雷蕭條邱壑願言朝市忘懷淡薄比契沉冥均情寂寞往塵守官及爾同僚墳簞合韻琴瑟

俱調丹墀踵武清道齊鑣跡淪閑曠心共津濠  
乃眷平生相忻同趨殷勤宴喜流連辭賦溘矣  
不追長違世務詠歌徒在音徽空樹昔猶肢體  
與子裘裳今其往也生死殊方形骸何促天地  
何長申茲沃醑贈以哀傷嗚呼哀哉



樂府

美女篇二首

楚襄遊夢去，陳思朝洛歸。  
參差結旌旆，掩靄頓騶騑。  
變化看臺曲，駭散屬川沂。  
仍令賦神女，俄聞要處妃。  
照梁何足艷，昇霞反奮飛。  
可言不可見，言是復言非。

我帝更朝衣，擅寵無論賤。  
入愛不嫌微，智瓊非俗物。  
羅敷本自稀，居然陋西子。  
定可比南威，新吳何爲誤。  
舊鄭果難依，甘言誠易

污得失定因機，無憎藥英妒。心賞易侵違。

永世樂

綺窗斜影入，上客酒須添。翠羽方開美，鉛華汙  
不霑。關門今可下，落珥不相嫌。

櫂歌行

雪溜添春浦，花水足新流。桃發武陵岬，柳拂武  
昌樓。

挾琴歌

琴風定傳人，曲房兼送小。地百宅，香白馬金鞍。



三才圖會卷之三

魏持進集

卷全

樂府

三

春三月  
桃花開  
杏花開  
梨花開  
榆莢開  
槐花開  
桐花開  
楝花開  
桐子落  
桐子落  
桐子落

桐子落



後園宴樂

束馬輕燕外，獵雉陋秦中。  
朝車轉夜轂，仁旗指旦風。  
式宴臨平圃，展衛寫屠穹。  
積崖疑造化，導水逼神功。  
樹靜歸烟合，簾疎反照通。  
一逢堯舜日，未假北山叢。

喜雨

霞暉染刻棟，礎潤上雕楹。  
神山千葉照，仙草百花榮。  
瀉溜高齋響，添池曲岸平。  
滴下如珠落，波

迴類壁成氣調登萬里年和欣百靈定知丹甃  
出何須銅雀鳴

看柳上鵲

背歲心能識登春巢自成立枯隨雨霽依枝須  
月明疑是彫籠出當由抵玉驚間關拂條軟迴  
復振毛輕何獨離婁意傷人但未聽

晦日汎舟應詔

裊裊春枝弱關關新鳥呼棹唱忽逶迤菱歌時  
頽暮春賞芳月色宴言忘日暮游豫慰人心照



月下秋宴

此夕甘言宴，月照露方塗。使星疑向蜀，劍氣不關吳。良交契金水，上客慰萱蘇。何必應劉輩，還來遊鄴都。

五日

麥涼殊未畢，蜩鳴早欲聞。喧林尚黃鳥，浮天已白雲。辟兵書鬼字，神印題靈文。因想蒼梧郡，茲日祀東君。

庭栢

古松圖偃蓋，新栢寫鑪峰。凌寒翠不奪，迎暄綠  
更濃。茹葉輕沈體，咀實化衰容。將使中臺廢，違  
山能見從。

蜡節

凝寒迫清祀，有酒宴嘉平。宿心何所道，籍此慰  
中情。



本傳

魏收字伯起小字佛助鉅鹿下曲陽人也曾祖  
緝祖韶父子建字敬忠贈儀同定州刺史收年  
十五頗已屬文及隨父赴邊好習騎射欲以武  
藝自達榮陽鄭伯調之曰魏郎弄戟多少收慙  
遂折節讀書夏月坐板床隨樹陰諷誦積年板  
床爲之銳減而精力不輟以文華顯初除太學  
博士及爾朱榮于河陰濫害朝士收亦在圍中

以日宴獲免吏部尚書李神儁重收才學奏授  
司徒記室參軍永安三年除北主客郎中節閔  
帝立竝簡近侍詔試收爲封禪書收下筆便就  
不立橐草文將千言所改無幾時黃門郎賈思  
同侍立深竒之白帝曰雖七步之才無以過此  
遷散騎侍郎尋勅典起居注併修國史兼中書  
侍郎時年二十六孝武初又詔收攝本職文誥  
填積事咸稱旨黃門郎崔懷從齊神武入朝燠

約於世收初不肯用裴爲令收云夫豐



忌時節閔帝殂令收爲詔悽乃宣言收普泰世  
出入幃幄一日造詔優爲詞旨然則義旗之士  
盡爲逆人又收父老合解官歸侍南臺將加彈  
劾賴尚書辛雄爲言於中尉綦儁乃解收有賤  
生弟仲同先未齒錄因此怖懼上籍遣還鄉扶  
侍孝武嘗大發士卒狩於嵩少之南旬有六日  
時天寒朝野嗟怨帝與從官及諸妃主奇伎異  
飾多非禮度收欲言則懼欲嘿不能已乃上南

狩賦以諷焉。時年二十七，雖富言淫麗，而終歸雅正。帝手詔報焉，甚見褒美。鄭伯謂曰：「卿不遇老夫，猶應逐兔。」初，神武固讓天柱大將軍，魏帝敕收爲詔，令遂所請，欲加相國，問品秩。收以實對，帝乃止。收旣未測主相之意，以前事不安，求改，詔許焉。久之，除帝兄子廣平王贊開府從事中郎。收不敢辭，乃爲庭竹賦，以致已意。尋兼中書舍人，與濟陰溫子昇、河間邢子才、齊譽世號三才。時孝武清忌，神武內有間隙，收遂以父疾



陽之甲。尋而神武南上。帝西入闕。收兼通直散騎常侍。副王昕使梁。昕風流文辯。收辭藻富逸。梁主及其群臣。咸加敬異。先是南北初和。李諧。盧元明。首通使命。二人才器並爲鄰國所重。至此梁主稱曰。盧李命世。王魏中興。未知後來復何如耳。收在館。遂買吳婢入館。其部下有買婢者。收亦喚取。遍行姦穢。梁朝館司皆爲之獲罪。人稱其才而鄙其行。在途作聘遊賦。辭甚美盛。

使還尚書右僕射高隆之求南貨於昕收不能  
如志遂諷御史中尉高仲密禁止昕收於其臺  
久之得釋及孫搴死司馬子如薦收召赴晉陽  
以爲中外府主簿以受旨乖忤頻被嫌責加以  
箠楚久不得志會司馬子如奉使霸朝收假其  
餘光子如因宴戲言於神武曰魏收天子中書  
郎一國大才願大王借以顏色由此轉府屬然  
未甚優禮收從叔季景有才學厯官著名並在  
收前然收常歎忽季景收初赴任願部李庶者



故大司農許之子也。以事奔吳。利貞言收曰。朝便有二魏。收率爾曰。以從叔見比。便是邪輸之比卿。邪輸者。故尚書令陳留公繼伯之子也。愚癡有名。好自入市肆。高價買物。商賈共所嗤翫。收忽以季景方之不遜。例多如此。收本以文才必望穎脫。見知位既不遂。求修國史。崔暹爲言於文襄曰。國史事重。公家父子。霸王功業。皆須具載。非收不可。文襄啓收兼散騎常侍。修國史。武定二年。除正常侍領。兼中書侍郎。仍修史。

魏帝宴百僚問何故名人日皆莫能知收對曰  
晉議郎董勛荅問禮俗云正月一日爲雞二日  
爲狗三日爲猪四日爲羊五日爲牛六日爲馬  
七日爲人時邢邵亦在側甚惡焉自爲魏梁和  
好書下紙每云想彼境內甯靜此率土安和梁  
後使其書乃去彼字自稱猶著此欲示無外之  
意收定報書云想境內清晏今萬國安和梁人  
復書依以爲體後神武入朝靜帝授相國固讓

今文爲系冬或日上文襄時寺則申武旨文曰



謂司馬子如曰、魏收爲史官、書吾等善惡、聞北  
伐時、諸貴常餉史官、飲食司馬僕射頗曾餉不、  
因共大笑、仍謂收曰、卿勿見元康等在吾目下  
趨走、謂吾以爲勤勞、我後世身名在卿手、勿謂  
我不知、尋加兼著作、即收昔在京洛、輕薄尤甚、  
人號云、魏收、驚蛺蝶、文襄曾遊東山、令給事黃  
門侍郎顥等宴、文襄曰、魏收恃才使氣、卿須出  
其短、往復數番、收忽大唱曰、楊遵彥理屈已倒、

愔從容曰。我綽有餘暇。山立不動。若遇當塗。恐  
翩翩遂逝。當塗者魏翩翩者蛺蝶也。文襄先知  
之。大笑。稱善。文襄又曰。向語猶微。宜更指斥。愔  
應聲曰。魏收在。并作一篇詩。對衆讀訖。云。打從  
叔季景。出六百斛米。亦不辨此。遠近所知。非敢  
妄語。文襄喜曰。我亦先聞衆人皆笑。收雖自申  
雪。不復掩拒。終身病之。侯景叛入梁。寇南境。文  
襄時在晉陽。令收爲檄。五十餘紙。不日而就。文  
襄

數。收。用。令。送。侯。景。所。友。執。筆。三。更。更。改。文。過。七。



紀文襄善之。魏帝曾季秋大身普令。則言。中言。  
末云。尺書徵建鄴。折簡召長安。文襄壯之。顧諸  
人曰。在朝今有魏收。便是國之光采。雅俗文墨。  
通達縱橫。我亦使子才子昇。時有所作。至於詞  
氣。並不及之。吾或意有所懷。忘而不語。或語而  
不盡。及收呈草。皆以周悉。此亦難有。又敕兼主  
客郎。接梁使謝琰。徐陵。侯景既陷梁。梁鄱陽王  
範時爲合州刺史。文襄敕收以書喻之。範得書。  
乃率部伍西上。刺史崔聖念入據其城。文襄謂

收曰、今定一州、卿有其力、猶恨尺書、徵建鄴、未  
効耳、文襄崩、文宣如晉陽、令與黃門郎崔季舒  
高德正、吏部郎中尉瑾於北第掌機密、轉秘書  
監、仍兼著作郎、又除定州大中正、時齊將受禪、  
楊愔奏收置之別館、令撰禪代詔冊諸文、遣徐  
之才守門不聽出、天保元年、除中書令、仍兼著  
作郎、封富平縣子、二年、詔撰魏史、四年、除魏尹、  
故優以祿力、專在史閣、不治郡事、初、帝令羣臣  
各言志、收曰、臣願得直筆秉觀、早成魏書、故帝



而巳。帝敕收曰。好直筆。我終不作。魏太武誅史官。始魏初鄧彥海撰代記十餘卷。其後崔浩典史。游允程駿李彪崔光李琰之徒。世修其業。浩爲編年體。彪始分作紀表志傳。書猶未出。宣武時命邢巒追撰孝文起居注。書至太和十四年。又命崔鴻王遵業補續焉。下訖孝明。事甚委悉。濟陰王暉業撰辨宗室錄三十卷。收於是與通直常侍房延祐司空司馬辛元植國子博士刁

柔裴昂之尚書郎高孝幹專總斟酌以成魏書  
辨定名稱隨條甄舉又搜採亡遺綴續後事備  
一代史籍表而上聞之勒成一代大典凡十二  
紀九十二列傳合一百一十卷五年三月奏上  
之秋除梁州刺史收以志未成奏請終業許之  
十一月復撰十志天象四卷地形三卷律歷二  
卷禮樂四卷食貨一卷刑罰一卷靈徵二卷官  
氏二卷釋老一卷凡二十卷續於紀傳合一百  
三十卷分爲十二帙其史三十五列二十五序



九十四論前後二表一  
逼唯取學流先相依附者房延祐辛元植睦元  
讓雖夙涉朝位並非史才刀柔裴昂之以儒業  
見知全不堪編輯高孝幹以左道求進修史諸  
人祖宗姻戚多被書錄飾以美言收性頗急不  
甚能平夙有怨者多沒其善每言何物小子敢  
共魏收作色舉之則使上天按之當使入地初  
收在神武時爲太常少卿修國史得陽休之助  
因謝休之曰無以謝德當爲卿作佳傳休之父

固魏世爲北平太宗以貪虐爲中尉李平所彈  
獲罪載在魏起居注收書云固爲北平甚有惠  
政坐公事免官又云李平深相敬重爾朱榮於  
魏爲賊收以高氏出自爾朱且納榮子金故減  
其惡而增其善論云若修德義之風則韓彭伊  
霍夫何足數時論旣言收著史不平文宣詔收  
於尚書省與諸家子孫共加論討前後投訴百  
有餘人云遺其家世職位或云其家不見記錄  
或云妄有非毀收皆隨伏答之范陽盧斐父同



附出族祖玄傳丁瑱丘李度家傳稱其本是身  
國家人裴庶譏議云史書不直收性急不勝其  
憤啓誣其欲加屠害帝大怒親自詰責裴曰臣  
父仕魏位至儀同功業顯著名聞天下與收無  
親遂不立傳博陵崔綽位止本郡功曹更無事  
迹是收外親乃爲傳首收曰綽雖無位名義可  
嘉所以合傳帝曰卿何由知其好人收曰高允  
曾爲綽讚稱有道德帝曰司空才士爲人作讚  
正應稱揚亦如卿爲人作文章道其好者豈能

皆實收無以對戰慄而已但帝先重收亦不欲  
加罪時太原王松年亦謗史及斐庶並獲罪各  
被鞭配甲坊或因以致死盧思道亦抵罪然猶  
以羣口沸騰救魏史且勿施行令羣官博議聽  
有家事者入署不實者陳牒於是衆口誼然號  
爲穢史投牒者相次收無以抗之時左僕射楊  
愔右僕射高德正二人勢傾朝野與收皆親收  
遂爲其家並作傳二人不欲言史不實抑塞訴  
辭終文宣世更不重論又尚書陸杲嘗謂音曰



魏收魏書可謂博物宏才有大功于魏室。收曰：此謂不刊之書，傳之萬古。但恨論及諸家枝葉親姻，過爲繁碎，與舊史體例不同耳。收曰：往因中原喪亂，人士譜牒遺逸略盡，是以具書其支派。望公觀過知仁，以免尤責。八年夏，除太子少傅，監國史，復參議律令。三臺成，文宣曰：臺成須有賦，愔先以告收。收上皇居新殿臺賦，其文甚壯麗。時所作者自邢邵以下，咸不逮焉。收上賦前數日，乃告邵。邵後告人曰：收甚惡人，不

早言之帝曾遊東山。敕收作詔。宣揚威德。譬喻  
關西。俄頃而訖。詞理宏壯。帝對百寮大嗟賞之。  
仍兼太子詹事。收娶其舅女崔昂之妹。產一女。  
無子。魏太常劉芳孫女。中書郎崔肇師女。夫家  
坐事。帝並賜收爲妻。時人比之賈充。置左右。夫  
人然無子。後病甚。恐身後嫡媵不平。乃放二姬。  
及疾瘳。追憶作懷離賦。以申意。文宣每以酣宴  
之次云。太子性懦。宗社事重。終當傳位常山。收  
謂楊潛曰。古人云。太子國之根本。不可動搖。臣



尊三爵後。每言傳位常山。令臣下。死。但恐國家不安。惜以收言。自於帝。自此便止。須決行。此言若戲。魏收既忝師傅。正當守之以死。帝數宴喜。收每預侍從。皇太子之納鄭良娣也。有司備設牢饌。帝既酣飲。起而自毀覆之。仍詔收曰。知我意不。收曰。臣愚謂良娣既東宮之妾。理不須牢。仰惟聖懷。緣此毀去。帝大笑。握收手曰。卿知我意。安德王延宗納趙郡李祖收女爲妃。後帝幸李宅宴。而妃母宋氏薦二石榴於帝。

前問諸人莫知其意帝投之收曰石榴房中多  
子王新妃母欲子孫衆多帝大喜詔收卿還將  
來仍賜收美錦二疋十年除儀同三司帝在宴  
席口敕以爲中書監命中書郎李愔於樹下造  
詔愔以收一代盛才難於率爾久而未訖比成  
帝已醉醒遂不重言愔仍不奏事竟寢及帝崩  
於晉陽驛召收及中山太守楊休之叅議吉凶  
之禮并掌詔誥仍除侍中遷太常卿文宣謚及  
廟號陵名皆收議也及孝昭居中宰事命收柩



中爲諸詔文積日不出。輒中書監。皇建元年。陳  
兼侍中。右光祿大夫。仍儀同監史。收先副王昕  
使梁。不相協睦。時昕弟晞親密。而孝昭別令陽  
休之兼中書。在晉陽。典詔誥。收留在鄴。蓋晞所  
爲。收大不平。謂太子舍人盧詢祖曰。若使卿作  
文誥。我亦不言。又除祖珽爲著作郎。欲以代收。  
司空主簿李翥。文詞士也。聞而告人曰。詔誥悉  
歸陽子烈。著作復遣祖孝徵。文史頓失。恐魏公  
發背於時。詔議二王三恪。收執王肅。杜預議以

元司馬氏爲二王通曹備三恪詔諸禮學之官皆執鄭立五代之議孝昭后姓元議恪不欲廣及故議從收又除兼太子少傅解侍中帝以魏史未行詔收更加研審收奉詔頗有改正及詔行魏史收以爲直置秘閣外人無由得見於是命送一本付并省一本付鄴下任人寫之大甯元年加開府清河二年兼右僕射時武成酣飲終日朝事專委侍中高元海元海凡庸不堪大任以收才名振俗都官尚書畢義雲長於斷劄



乃虛心倚仗收畏避不能匡救爲議者所譏帝  
於華林別起立洲苑備山水臺觀之麗詔於閣  
上畫收其見重如此始收比溫子昇邢邵稍爲  
後進邵旣被疎出子昇以罪幽死收遂大被任  
用獨步一時譏論更相訾毀各有朋黨收每議  
陋邢邵文邵又云江南任昉文體本疎魏收非  
直模擬亦大偷竊收聞乃曰伊常於沈約集中  
作賊何意道我偷任昉任沈俱有重名邢魏各  
有所好武平中黃門郎顏之推以二公意問僕

射祖珽珽荅曰見邢魏之臧否卽是任沈之優劣收以溫子昇全不作賦邢雖有一兩首又非所長常云會須作賦始成大才士唯以章表碑誌自許此外更同兒戲自武定二年已後國家大事詔命軍國文詞皆收所作每有警急受詔直成或時中使催促收筆下有同宿構敏速之工邢溫所不逮其叅議典禮與邢相埒旣而趙郡公增年獲免收知而過之事發除名其年文



當流以贖論三年起除清都尹尋遣黃門郎元  
文遙救收曰卿舊人事我家最久前者之罪情  
在可恕比令卿爲尹非謂美授但初起卿斟酌  
如此朕豈可用卿之才而忘卿身待至十月當  
還卿開府天統元年除左光祿大夫二年行齊  
州刺史尋爲真收以子姪少年申以戒厲著枕  
中篇其後羣臣多言魏史不實武成復敕更審  
收又回換遂爲盧同立傳崔綽返更附出楊愔

家傳本無有魏以來一門而已至是如此八字  
又先云弘農華陰人乃改自云弘農以配王惠  
龍自云太原人此其失也尋除開府中書監武  
成崩未發喪在內諸公以後主卽位有年疑於  
赦令諸公引收訪焉收固執宜有恩澤乃從之  
掌詔誥除尚書右僕射總議監五禮事位特進  
收奉請趙彥深和士開徐之才共監先以告士  
開士開驚辭以不學收曰天下士皆由王五禮



司空尚書左僕射謚文貞有集七十卷收碩學  
大才然性褊不能達命體道見當塗貴遊每以  
言色相悅然提獎後輩以名行爲先浮華輕險  
之徒雖有才能弗重也初河間邢子才及季景  
與收並以文章顯世稱大邢小魏言尤俊也收  
少子才十歲子才每曰佛助察人之偉後收稍  
與子才爭名文宣貶子才曰爾才不及魏收收  
益得志自叙云先稱溫邢後曰邢魏然收內陋



邢心不許也。收旣輕疾，好聲樂，善胡舞。文宣末數於東山，與諸優爲獼猴與狗鬪。帝寵狎之，收與外兄博陵崔巖嘗以雙聲嘲收曰：「愚魏衰收，收荅曰：「顏巖腥瘦，是誰所生？羊頤狗頰，頭團鼻平。飯房笊籠着，孔嘲玃其辯捷，不拘若是旣緣史筆，多憾於人。齊亡之歲，收豕被發，棄其骨於外。先養弟子仁表爲嗣，位至尚書膳部郎中。隋開皇中卒於溫縣令。」







